







TERREVRS

PANNIQUES DE CEVX

qui pensent que l'alliance d'Espagne doiue mettre la guerre en France.



A PARIS,

Chez NICOLAS ALEXANDRE, ruë des Mathurins.

M. DC. XV.

THE NEWSCRAY

AV LECTEVR,

YOU ANT courir des Libelles qui n'ont pour fondement que la medisance, ny pour but que la sedition, Qui par des paroles escrites auec peu de ingement, & moins de raison, taschent d'irriter le peuple: & tantost en le flattant de l'esperance de le soulager, & du desir de venger la mort du feu Roy (choses toutes eslorgnées, & contraires à la pensée de ceux qui le disent,) & tantost en l'espouventant des menaces, & des forces d'un party qui ne peut subsister qu'en la confusion, le veulent desbaucher de l'obeyssance qu'il doit au Roy. Ie me suis essayé de desabuser les moins clair-voyans, & par des raisons, & par des exemples irreprochables, refuter des simples paroles qui ne contiennent ny l'vn, ny l'autre. Si le discours en est libre, il est encore plus veritable, Mais qui parmy ceste liberté, n'offense point le respect que l'on doit aux grands, ny ne procede d'autre passion, que de celle que i'ay de sernir mon pays, & mon Roy. ADieu.

Ca-1

Wistar



LES TERREVRS PANIQUES de ceux qui pensent que l'alliance d'Espagne doine mettre la guerre en France.

STANT demeure dans Paris depuis que le Roy en est party pour aller en ce voyage qui a donné l'alarme à tant de personnes, lesquelles s'effroyent de leur ombre; Et oyant parler si diuersement de son

Mariage, ie ne me puis tenir d'en dire ma ratelée come les autres, bien qu'auec plus de raison que la plus part de ceux qui en babillent. Mais d'autant qu'on a desia discouru sur le bien, ou le mal qui pouvoit venir de cette Alliance, & que s'y vouloir arrester dauantage, seroit rédire lés mesmes choses. Ie parleray seulement de ceux qui taschent d'espouvanter les sujets du Roy, des mouvemens de Monsseur le Prince, ou de ceux qu'on appelle de la Religion pretenduë resormée.

Ceux-là disent que Monsieur le Prince a ie ne sçay combien de mille hommes, auec lesquels il est resolu de rompre le coup de ce Mariage, & essoigner du Conseil de sa Majesté les personnes qu'il luy a nommées, auec tout plein d'autres choses exprimées plus tront l'Estat en peril.

Pour moy, ie ne pense pas que les vns ny les autres en ayent enuie; mais se croy qu'ils en ont encore moins de moyen: Et d'autant qu'en ces choses-la l'on se paye plustost des exemples que des raisons, & que nous en auons chez nous des plus illustres qui soient au monde; Nous proposerons deux factions les plus grandes, & les plus fortes qui se soient iamais veues dans vn Estat, la derniere desquelles s'est dissipée en fort peu de temps, auec de petites forces; & l'autre ayant estéreduite à l'extremité, ne s'est depuis restaurée que par les mesmes moyens par lesquels on l'a

voulu perdre.

Ic parle de ceux de la Religion, & de ceux de la Ligue; Ausquels pour estre les derniers, & les exemples plus fraiz, nous nous arresterons dauantage. Elle eust premierement la Religion pour pretexte, qui est la plus violente passion des ames, & qui porte plus furieusement les hommes aux armes. Et quant à ses partisans, elle cust son pere en Espagne Philippe II. I'vn des plus grands Rois que ce royaume ait iamais eu. Son parrain en Italie qui estoit le Pape, de la puilsance & authorité duquel personne ne doubte: Et son chef ministeriel en France le feu Duc de Guise, l'un des plus braues l'rinces, non seulement de sa maison qui en a porté de tres-excellens, mais de toute l'Europe; lequel réduisit Henry III. à la iurer, contre qui elle auoit esté iurée. Il estoit assisté de tout le Clerge, & d'vne bonne partie de la Noblesse de

France, de tout le peuple, & de tous les Parlemens, il ne s'en falloit que Bourdeaux; qui fut retenu en son deuoir par la prudence & sidelité du Mareschal de Matignon, lequel en rapporte encore dans le tombeau vne louange & reputation immortelle.

Outre cela il auoir vn auantage que Prince auiourd'huy viuant ne peut iamais esperer; c'est qu'il auoit à faire à vn Roy qu'il auoit sceu rendre tellement odieux à tous ses subiets, qu'il n'eust point de peine à les faire rebeller contre luy. Là où çeluy que DIEV nous a maintenant donné, en est autant aymé comme l'autre en estoit hay: Et certainement à bon droict, car iamais Prince ne donna de plus grandes esperances de la bonté qui est l'objet de l'amour. D'ailleurs la memoire glorieuse du Grand Henry luy sert de beaucoup, car tout le monde se ressouuiét qu'il sauua l'Estat, que les autres auoient bien fort hazardé, & chacun conserue encore au fils l'amour, & l'obligation qu'il deuoit au Pere. Joint que l'expesience des troubles passez, & les playes encore fraisches & sanglantes des dernieres rebellions nous retiennent en nostre deuoir, & nous font sagement dis-*cerner le sujet d'auec le pretexte de ceux qui remuét; Tellement qu'aucun ne peut maintenant rien auoir de cè qu'auoit alors le feu Duc de Guise.

Auecque tout cela, ce pauure Prince y perdit la vie, & Monsieur du Maine qui luy succeda peu de temps apres, sa creance auec celle de tout son party: & croit on que sas le coup du Ciel ou plustost d'Enfer de Iacques Clemér, il y eust bien perdu dauatage. Ce Prince qui neantmoins estoit grand, & qui est mort en la reputation de grand Capitaine, & grand homme debien (deux choses qui ne vont pas tous-

jours ensemble,) Apres tant de breuuages de rebellion qu'il auoit goustez par vne passion plus naturelle que raisonnable, en sut tellement degousté, que faisant appeller Monsieur du Maine son fils vn peu deuant son trespas pour receuoir sa derniere benediction, Entre plusieurs graues discours qu'il luy sit de l'obeyssance, service & fidelité que les sujets doivent à leur Souuerain, il luy dit, Qu'au lieu de sa benediction, il luy donnoit sa malediction, si pour quelque occasion, ou prétexte que ce fut, il embrassoit iamais autre party que celuy du Roy, parole espouuentable que ce Prince ne doit iamais oublier, & que l'ay bien voulu mettreicy à l'honneur de la memoire de celuy qui l'a ditte, d'autant qu'elle a esté representée depuis peu de temps à Monsseur du Maine, par vn Euelque qui auoit esté present alors qu'elle luy sur proferée:

Voyons maintenant si le party de Monsieur le Prince est fortissé de toutes ces choses. Premierement le pretexte n'a rien de commun auec la Religion: Celuy de l'Estat est foible, & puis descouvert des l'Esté passé, ou le peuple qui a veu ses armes se ressourient encore de quelle façon il l'a soulagé, & ne croira iamais que la guerre soit vne medecine propre à son mal, ny que des soldats qui emportoient insques à la paille du lict, le doinent mettre à son aisse, tellement qu'il ne reste plus à vuider que le mariage du Roy, & la instice des personnes qu'on luy

a nommées.

Or pour le mariage, le pretexte en pouvoir avoir quelque lustre du temps que le Roy estoit encore Mineur: & de fait ceux qui en parloiét en ce tempslà ne disoient, sinon qu'il falloit attendre qu'il sust Majeur. Mais à present, Quelle insolence est-ce à ses subjects, de le vouloir assubjettir luy-mesme à ne se marier point, ou bié à se marier à leur fantasse? Ouy, mais voicy la terreur panique: Le Roy d'Espagne, disent-ils, qui enuironne la France de tous costez, la viendra lors engloutir. A cela il y a tant de choses à à respondre, qu'on est plus empesché de choisir les

raisons, que de les chercher.

Mais premierement, si le Roy d'Espagne nous deuore, ainsi que Saturne saisoit ses enfans, ie demandérois à ces gens-là qui sont en si grand soucy de l'Estat: Qui perdroit en cela dauantage, ou eux qui ne pourroient au pis aller que changer de maistre: ou sa Majesté, qui ne pourroit perdre l'Estat qu'auec savie? car les Royaumes ne seperdent pas à moins. Que si l'on void euidemmet que la perte que feroit le Roy seroit incomparablement plus grande que celle de tous ses subjets: pourquoy ne le laissonsnous preuoir & preuenir ces inconueniens auec son conseil, & non pas faire les entendus, & les interessez en vne chose où son interest est si grand par dessus le nostre? N'est-il pas Roy afin de nous conseruer,& nous commander? Et ne sommes-nous pas ses sujets asin de luy obeyr, & de le seruir sans entrer en cognoissance de ce qu'il commande? Voudrions nous rendre sa conditio pire que celle d'vn chef d'Armée, qui fera faire cent mouuemens à ses soldats, desquels ils ne sçauront nullement la cause: Voila pour preuenir toute dispute, & monstrer que sa Majesté n'est sujete de rendre conte de ses actions qu'à Dieu seul, & moins à ses subjets qu'à tous autres.

Mais pour faire voir que c'est vne terreur panique, Quelle raison y a-il que le Roy d'Espagne nous puisse nuire par le moyen de ceste Alliance? Est-ce parce qu'il prend Madame, ou parce qu'il donne son Infante? Si pour Madame, le procez en est desia vuidé il y a long tempe, & principalement aux despens de l'Angleterre, qui fait voir à tout le monde que les filles ne succèdent point en France: S'il la vouloit, ou la pouvoit empieter, ce ne seroit iamais dessous ce pretexte. Et quoy? n'y a-il pas eu d'autres filles de Frace mariées en Espagne? L'Archiduchesse qui est encores en Flandres, n'en est-elle pas descendue? pour quoy est-ce qu'il pretendroit dauántage de ce mariage iéy, que des autres? Cela n'a couleur, ny apparéce quelcoque: Quand le Roy d'Espagne nous voudra quereller, il ne taudra iamais à trouver

des pretextes plus especieux.

Et si c'est parce qu'il donne son Infante, Quelle raison y a-il de croire qu'vn enfant, auquel on a desia fait son train & sa maiton de François auant qu'elle soit en France, y puisse apporter quelque preiudice? Est-ce la premiere que nous auons eue d'Espagne? La mere de S. Louys qui regit si heuteutement le Royaume durant les voyages que ce braue Roy fit en Asie, & en Afrique, & à la Regence de laquelle toute la France en pleins Estats, & deuant eux le Parlement a comparé iustement celle de la Reyne: n'estoit-elle pas Espagnole? La femme du Roy François premier n'estoit-elle pas sœur de l'Empereur Charles le Quint, Roy d'Espagne? Auons-nous plus de sujet de craindre ceste Alliance icy, que celle-là? Ce Roy là estoit-il moindre, ou plus amy de la France que cestuy-cy? Y eust-il iamais ennemy qui eust tant d'enuie de la deuorer, ny qui fist tant d'efforts pour y paruenir? Et neatmoins il ne se trouue point

que les François de ce temps-là fussent si craintiss, d'entrer en ombrage de ceste Alliance? Ceatainemét c'est trop faire d'honneur aux Espagnols, de leur monstrer que nous les redoutons quand ils nous recherchent: nous, qui ne les auons iamais craints les armes en main: c'est les conuier à ce qu'ils n'osent pas entreprendre, & donner le courage de nous attaquer à ceux qui n'aguere pésoiét que ce leur estoit

beaucoup de gloire de nous attendre.

Mais ce qui est le plus importat, comme la crainte ne fait le plus souuent qu'auancer le mal, c'est leur faciliter les moyens d'aspirer à ce qu'ils desirent. Car leuant les armes soubs pretexte de ceste crainte,& allumant la guerre ciuile en France, qui ne sçait que c'est la diuiser en parties & factios contraires, & par consequent l'affoiblir, & luy oster le moyen de se defendre contre l'Estranger? Et qui ne sçait que le Roy d'Espagne ayant assisté l'vn des partis, & assoibly l'autre, se pourroit mieux emparer de la France, diuisée apres les ruines d'vne longue guerre, que non pas maintenant qu'elle est vnie & florissante par vne Alliance? Ce sont donc ceux qui redoutent, ou qui font semblant de craindre ce Mariage, qui veulent exposer la France à la seruitude de l'Espagnol, & non pas ceux qui l'ont contracté. Mais c'est assez pour le Mariage-

Quant à la Iustice qu'on requiert à sa Majesté, ie ne veux pas faire icy l'Aduocat, ni pour les vns, ni pour les autres: & encore moins le Conseiller d'Estat. Mais d'autant qu'il importe principalement au Roy, c'est à luy d'en cognoistre, & d'en iuger. Bien dirayie en passant, que ie n'ay iamais veu de procedure, ni formes pareilles à celle-cy: Au contraire, en la plus-

part des crimes qui viennent en Iustice, les accusateurs sont rousiours presens, & les accusez quelquesfois absens, & icy tout au rebours. Mais tant y a que ce sont des particuliers pour lesquels on ne doit point troubler vn si grand Estat: aussi n'y a-il pas guerre d'apparèce que beaucoup de gens s'y fassent rouper le contra le c

rompre la teste.

Voila en effect tous les pretextes qu'ils peuuent auoir: car de Religion il ne s'en parle point, Dieu mercy: le party est formé dans l'Estat, & tous les François sont d'accord, qu'il vaut mieux l'y tollerer auec incommodité, que l'en arracher auec peril. Il reste maintenant à voir la creance que Monsieur le Prince y peut auoir, & les moyens de soustenir ses

pretextes.

Quant à la creance, elle est bien essoignée de celle que ses predecesseurs y ont euë, car ils faisoiét prendre les armes en une nuict à tout le party par toute la France, sur vn simple aduis, & sans aucune assemblée, ny deliberation de conseil: Ce que toutes les raisons du monde seroient maintenant bien courtes à leur pounoir persuader. Et outre la creance qu'ils auoient dans le Royaume, ils l'auoient encote si grande parmi les estrangers interessez en leur cause, qu'ils y leuoient des armées à credit, qui ne leur coustoient quasi rien: Et ce qui est encore plus admirable, les soldats François leur donnoient de l'argent, au lieu d'en prendre, pour payer les Estrangers: ce que ie n'ay iamais leu de ceux de Cesar, ni d'autre Capitaine qui fut iamais. Or si celase doit esperer de ceux qui seruiront Monsieur le Prince, i'en demade à ceux qui le suivirent l'Esté passé. Ce n'est pas qu'il ne soit aussi grand & puissant Prince comme ses predecesseurs, mais c'est que la cause n'est pas semblable... Et puis il n'est pas de mesme Religion, ayant esté instruit en meilleure eschole, & si bien versé en la controuerse, que ie l'ay veu confondre des plus habilles en la doctrine de ceste secte: & plusieurs luy ont ouy dire, qu'il se feroit aussi tost Iuis, ou Mahometan, que Huguenot. Quelle apparéce donc qu'ils s'engagent au party d'vn Prince qui est d'vne Religion contraire à celle qu'ils croient? Et quand ils s'y engageroient, qu'en pourroit-il esperer que les mesmes euenemens qui succederent à ses Ancestres? Croiroit-il mieux faire auec tant de manquemens parmy eux, que ne firent les autres auec tant d'auanges? Ouy, mais ils sont à ceste heure plus forts qu'ils n'estoient alors: Au contraire, il n'y auoit alors fils de bonne mere qui ne fust des leurs: & le zele de leur Religion les portoiet à faire des choses que ceux-cy n'oseroient maintenant penser, tesmoin la coniuration d'Amboise & de Meaux.

Et pour le monstrer encore plus clairemet, voyons s'il se trouueroit quelqu'vn parmy eux qui s'osast promettre de faire signer vne requeste sà cinquante mille hommes de ce party, comme l'Admiral de Chastillon promit au temps du Roy Charles?

Mais Monsieur le Prince est assisté d'autres grands Princes, qui mettront de grandes forces ensemble. Ouy, Monsieur le Prince a-il le Pape qui luy enuoye icy des Legats, & des foudres d'Anatheme contrele Roy, comme auoit la ligue? A-il le Roy d'Espagne qui fasse couler des ruisseaux d'or par tout le Royaume? A-il les tailles du Roy que prenoit la Ligue, auec toutes les forces & reuenus de la France? A-il la creance, ni la bien-vueillance qu'auoit le seu Duc

de Guyse parmy le peuple, ny les moyens de luy rendre le Roy si odieux, come il auoit sceu rendre Henry troisiesme? A-il en fin le Clergé, les Villes, les Parlemets,& la plus grande partie de la Noblesse ? Que silne l'a point, commét voulez-vous qu'il fasse auec rien de tout cela, ce que la Ligue ne peut faire auec tant de choses? Mais cen'est pas aussi son dessein, il a trop d'interest au bien de cest Estat, pour en desirer la dissipatió, comme il nefaut pas croire aussi qu'aucun des Princes qui sont auec luy, le voulussent af-

fister en vne si mauuaise cause.

Le dessein de Monsieur le Prince n'estant donc que de rompre le mariage du Roy, ou du moins empescher qu'on ne le precipite, ainsi qu'il dit, & de faire punir ceux qu'il a nommez à sa Majesté. Il en arriuera l'vne de deux choses, ou que ne l'ayat peu par amour, il l'entreprendra de force, ou qu'il ne l'entreprendra pas. S'il ne l'entreprend, on dira qu'il a tort d, auoir refusé d'accompagner le Roy, pour demeurer icy les bras croisez: & s'il l'entreprend, on dira qu'il en a encore dauantage de l'entreprendie. Et de ces deux choses, s'ensuiura encore l'une de ces deux, c'est qu'il viedra à bout de son dessein, ou qu'il n'y viendra pas, comme il est le plus asseuré. S'il n'y vient pas, il aura tousiours offensé le Roy, & troublé l'Estat pour neant, deux choses de perilleuse consequéce: & s'il y viet, c'est le pis qui luy puisse arriuer. Car ayant violenté le Roy en vne chose si libre que le mariage, il faudra en fin qu'il pose les armes, quand bien elles seroiet victorieuses,& que cessant la cause, cesselle l'effet: & cependant le ressentimét que sa Majesté aura contre luy, sera d'autant plus vif que l'offense se trouuera grande.

Ie dis au pis aller, car il n'y a aucune apparéce que cela puisse estre: mais quand il seroit, le Roy en seroit tousiours quitte pour dire qu'il ne se veut pas marier, puis que ses subjets ne le trouuent bon, & n'en arriueroit autre chose. Mais ie ne sçay pas si ses sujets en seroient quittes pour dire qu'ils n'auoient en cela pensé qu'au seruice de sa Majesté: car tous ceux qui prennét les armes contre leurs Roys en disent autat. Ceux de la Ligue disoient au commencement que c'estoit pour rendre au Roy Henry troisses sen authorité, de laquelle ils le vouloiét despoüiller: Et autant en disoiét les Huguenots de François secod, & de Charles neus semes auec plus de pretexte que Monsieur le Prince: Mais il ne se faut pas amuser à chercher des preuues d'une chose si maniseste.

Toutesfois on replique icy deux choses qui ont esté dictes, pour monstrer les moyés que peut auoir Monssieur le Prince de trauerser le voyage du Roy, (mot qui fait mal à l'ouyr, & à l'escrire, qu'vn Roy de Frace soit trauersé par vn sié subjet en vn voyage qu'il fait dedas son Royaume.) L'vne qu'il est assisté de plusieurs Princes, qui ne sont en tout que Monssieur du Maine, & monssieur de Longueuille: L'autre, que le party de la Religion bransera pour luy.

Nous auons dessa preuenu ceste objection: Toutessois pour le contétemét des plus curieux, disons-

en encore vn mot.

Quant aux Princes qui l'assistent, ils sont grands & puissants pour toutes les autres choses qu'on voudra, pourueu que ce ne soit pour faire la guerre au Roy: car en ce fait-là ils ne sont rien à comparaison de ceux qui l'ont autresois entrepris à leurs despens: & ne pense pas que tous ensemble puissent des-

frayer trois mois vnearmez, pour petite qu'elle soit, là où sa Majesté en soustiendra dix. Et de dire que la guerre se nourrit d'elle-mesme, ce n'est pas le moyen de subsister, ny de la faire 48. ans en France, comme les Holandois au pais bas. Où il faut qu'ils permettent toutes sortes de violences aux soldats, en ne les payant pas, & parainsi qu'ils ruinent le pass, ou qu'é: les payant, ils se ruinent eux-mesmes. Or ruiner le pais, & se ruiner eux-melmes, est vne melme chose, car ils se ruineront auec le pretexte qu'ils ont de le soulager. Hé! comment fera-l'on accroire qu'on veut soulager la France, qu'on verra fumer souz les ruines de tant de flammes qu'ils y auront allumées? Ioinct qu'il n'y arien qui seruine plustost de soi-melme qu'vn'armée indisciplinée: Que s'ils la veulent discipliner, il l'a faut payer necessairement. Et d'où pris (demandoit la feu Royne Marguerite, l'Esté passé, vn iour qu'on luy disoit, que les mesmes Princes auoientiene sçay combien de gens:) d'où prendront-ils l'argent pour les soldoyer? car la guerre ne se fait plus à credit, les soldats ne se couronnent plus d'herbe, ny ne refusent plus les chaisnes d'or commeles premiers Romains. Monsieur le Prince de Condé Ayeul de cestui-cy, la fit quelque temps ainsi que nous auons dit: mais c'estoit en vne saison où le zele de la Religion estoit si ardent, qu'il faisoit donner de l'argent à ceux qui en demandent auiourd'huy, Et si auec tout cela, apres auoir disposé des moyens de tout son party, tant luy que son fils, qui ne luy cedent en rien, & obtenu des paix aduantageuses, les armes en main, ils sont morts toutestois bien pauures, & ont laissé Monsieur le Prince, ainsi que tout le monde sçait, le plus incommodé Prince de la Chrestienté. Et quant à seu Monsieur du Maine, qui iouyt si long temps des forces & des moyens de tout le Royaume outre ce qu'il tira d'Espagne, chacun void ce qui luy en est demeuré. Que peut-on donc esperer de leurs ensans, s'ils s'engagent si gayement en vne guerre contre le Roy, n'estans appuyez que deleurs fortunes particulieres? Carnous auons dessa monstré que le ser d'Allemagne bran-loit pour ceux de la Religion, l'or d'Espagne couloit pour ceux de la Ligue, & le plomb d'Italiene faisoit gueres moins d'essect que les autres deux: & neant-moins tout cela ayant esté court, quelle apparence y peut-ilauoir en la durée d'vn party, qui n'a rien de tout cela?

De penser que les mesmes Allemans, & les Anglois les fauoriseront: cela est fort incertain. Mais il est tres-certain que le Roy d'Espagne, le Pape, les Venitiens, & tous les Alliez de la Majesté l'assister ot fort fidellement, & de cela personne n'en douté. Mais chacun doute à bon droict des autres, des Allemans, parce qu'ils ne sont point interessez en cette cause, comme ils estoient du temps qu'on brussoit icy leurs confreres, & parainsi n'ont à faire de s'en mesler. Du Roy d'Angleterre, encore moins, parce qu'il est allié de sa Majesté, & d'ailleurs c'est vn Prince sage, & qui n'ayme pas moins la paix, qu'il hait mortellement les biouilleries dans vn Estat, joint que fauoriser vne reuolte chez ses voisins, ce seroit vn mauuais exemple en ses subjets propres: le Roy d'Angleterre est trop grand politique, & n'ayme pas si particulierement Monsieur le Prince, qu'il vueille perdre l'amitié du Roy pour la sienne. Et quant aux Hollandois qu'on met encore en ligne de conte, il

y a bien du discours & de la raison, à croire qu'vn Estat encore naissant, qui ne s'est formé, & ne subsiste encore auiourd'huy que par la faueur & les moyens de la France, luy donne maintenant quelque subjet de se joindre auecque l'Espagne pour le destruire. Ce sont donc des Terreurs paniques que

de nous voulcir espouuenter de cela.

Quant à ceux de la Religion, outre qu'ils ne sont pas en estat non plus que les autres, de nous faire plus de peur ny de mal, que d'en receuoir, ils perdroient lesubjet & le pretexte qu'ils ont toussours pris de leuer les armes, qui estoit la liberté de consciéce, en laquelle ils estoient forcez. Et s'ils ont esté battus par tout en vn subjet plein d'apparence, il est fort apparent qu'ils seront ruinez tout à fait, quand ils n'en auront du tout point, comme ils n'en peuuentiustement prendre. Car outre qu'ils ne sont nullement pressez en la liberté de leur conscience, ny priuez de l'exercice de leur Religió, ny des charges de ce Royaume, comme ils estoient, mais iouisfent des mesmes honneurs que les Catholiques, & ont l'entrée du cabinet comme auec les plus fauoris, ils ont encore dauantage vn fonds particulier de pésion destinée seulement pour eux, & ont basty leurs fortunes parmy nous dans les meilleures villes de France, qu'il faudroit quitter: Ce que iene croy pas qu'ils voulussent faire, pour aller tenir la campagne en Picardie, ou prendre vn meschant village en Gascogne auec Monsieur le Prince. Ie ne dy pas que quelques morfondus & desefpérez de leur party, aussi bien que des Catholiques, ne le suivissent, à la charge de le quitter à la premiere commodité que l'occasion leur presenteroit, mais que tout le corps dela

de la Religion s'embarque auec luy, c'est vne Ter-

reur panique. A meren in a nectualità de la focucio à

Et de fait, n'en auroit-on pas veu desia quelque esclat? Il me semble qu'il est plus facile d'empescher, vn Mariage auant qu'il se fasse, que de le rompre apres qu'il est fait. Le Roy est desia à Bourdeaux, ses Subjets luy osteront-ils sa femme par le chemin? Cecy me fait souvenir des entreprinses des Cheualiers de l'Isle ferme, qui osteront Oriane aux Romains, si ce n'est que ceux-là auoient pour pretexte le secours d'vne Princesse qu'on marioit, & desheritoit par force, auec lequel encorene l'ofterent-ils qu'aux Ambassadeurs, & ceux-cy n'en ayant aucun, la voudroient ofter au Roy mesme. Mais ie ne croy pas qu'il s'en puisse trouuer en Gaule, ny en toute la grand Bretagne qui soient si temeraires seulement de l'imaginer. Leurs Majestez y ont mis aussi tel ordre, que de quelque costéqu'on remuë, on se trouuera pris par tout: Car outre qu'elles ont dequoy se faire jour, & dissiper aussi bien les nuages qui se voudroient opposer à la clarté de leurs rayons, comme elle les dissiperent l'Esté passé par leur seule veuë: Elles ont laisse deux armées, la moindre desquelles est assez forte pour les faire recognoistre, l'yne dans le Royaume toubs le Mareschal de Boisdauphin, & l'autre à la frontiere soubs le Marquis de Spinola, Qui ne sont pas composées de soldats de quinze à la douzaine, comme ceux du party contraire, mais bien disciplinez, & payez, & qui soustenant vneiuste cause, ie laisse à penser ce qu'ils doiuent faire contre des soldats tels que ceux que nous auons deschiftrez.

Que si leur malheur artire les armes de sa Maje-

Ré sur leurs teltes, & qu'ils le contraignét de monter à cheual en personne pour leur fondre sur les bras: Que feront un tas de gens ramassez de toutes sortes, contre viie si genereuse Noblesse que celle de France, combattant aupres de son Roy ? ou pour mieux dire, qu'enssent-ils desia fait, si sa bonté ne les eust espargnez iusques à present? Car chacun sçait qu'ils ne hiblistent que par la patience, & que s'il ne preferoit la douceur à la violence, ils seroient desia perdus. Mais sa Majesté veut imiter le Soleil, & non pas le vent? Nesçauez-vous pas qu'ils firent vne fois gageure qui despouilleroit plustost vn homme? & que le vent le poussant rudement, luy faisoit d'autant plus garder sa robbe qu'il s'efforçoit de la luy oster, là où le Soleil le pressant doucement par la chaleur de ses rais, la luy fist quitter de luy-mesme.

Il y a encorevne autre chose entre mille que nous obmettons, c'est que quand le Roy auroit perdu dix batailles, il se remettra tousiours en moins de rien für ses pieds: Là où ses ennemis n'ont point de resfource, & ne se pourront iamais non seulement releuer quand ils seront abbatus, mais encore ne se pourrontiamais garder de tomber d'eux-mesmes. Pour preuue de cela, il ne faut que se representer la Ligue, laquelle toute grande, toute puissante, & toute espouventable comme nous l'auons veue, n'eust pas laissé de se ruiner d'elle mesme, quand mesme le feu Roiy n'eust point hasté sa ruine, parce que chacun y auotson dessein à part, & que bien qu'ils sussent tous d'accord d'empescher qu'il ne succedast à la couronne, ils ne l'estoient pas de celuy qu'ils de uoient mettre en sa place.

Et puis quels grands Capitaines pour entrepren

dre la guerre contre vn Roy de France? Ie ne veux pas dire que Monsseur le Prince, Monsseur de Longueuille, & Monsieur du Maine, ne soient vaillants de leurs personnes pour combatre en particulier. Mais pour commander en generaux d'armées, chacun sçait queleur aage, ny le temps auguel ils sont venus, ne leur permet pas d'auoir-les parties d'vn chef de guerre. Monsieur de Neuers en seait vout seul plus que tant qu'ils sont, mais ils l'ont perdu aufsi bien que Monsieur de Vendosme, qui estoient les deux ples belles plumes de leur aisle. Le Mareschal de Bouillon leur reste en core, qui est assez bon Capitaine, mais comme chacun sçait, & qui est plus pres de se voir enclos dedans le pourpris de sa petite principauté, non sienne, que d'en sortir pour mettre le feu dédans ce Royaume. Comparez maintenant ceste puissance à celle du Roy, & vous verrez que la peur qu'on nous en veut faire, est vue Terreur parier? rear comme bon inv teniste Carlesupia

ent veu plusieurs fois les Roys d'Espagne & d'Angleterre, liguez auec l'Empereur & le Pape, contre la France, sont maintenant deuenus susceptibles de ces impressions. Vous diriez que la moindre sueille qui, branle, tout est perdu. & où est doncques la race de ces genereux Gaulois, qui ne craignoient rien, sinon que le Ciel tumbast sur leurs testes? Il est vray, c'est vne destinée à nos ieunes Roys, de ne passer iamais leur premiere ieunesse sans quelque trouble, mais le repentir n'a pas esté moins fatal à tous ceux qui les ont troublez: & iamais homme n'a voulu ruiner cest Estat, qui ne s'y soit ruiné luymesme. Qu'on en voye l'Histoire, on trouuerra que

ce que ie dis est veritable.

Non pas que le croye que Monsieur le Prince, uy pas vn de ceux qui l'assistent ait ce dessein, la à Dieu ne plaise. Mais vn abisme appelle l'autre: l'on s'engage sans y penser au commencement, à des choses que la necessité nous contraint puis apres de faire. Le Conte Iulian qui mit les Mores en Espagne, ne pensoit qu'à venger son iniure particuliere, & perdit toute sa patrie. Feu Monsieur le Prince de Condé, & l'Admiral Chastillon, n'espouscrent le party de la Religion que pour s'en seruir contre ceux de Guise, & depuis ils se trouuerent insensiblement obligez à s'en seruir contre le Roy mesme: Les exemples n'en sont que trop familieres & domestiques à nostre grand malheur.

Voila doncques le sujet des Armes de Monsieur le Prince, car de dire que c'est pour sa iuste defense, personnene l'attaque, ny ne le poursuit, on le laisse aller & venir comme bon luy semble, On l'empesche bien d'entreprendre, mais on n'entreprend rien sur luy. Et quant au reste des subjects exprimez en son Manifeste, ausquels la reponce qu'on y a desia faicte, m'empesche de m'arrester, il en y a deux admirables que le ne puis passer soubs silence, l'vn, quand il se plaint qu'on hazarde la santé du Roy par ce mariage, l'autre qu'o l'a presse d'esteindre le droict annuel. Sans doute ce dernier n'est point de Monsieurle Prince, il est de quelqu'vn qui a payéla Paulette, lequel aymant mieux son interest particulier, que le bien public, s'est laisse trransporter à sa passion. Mais est il possible qu'il se trouve encore des gens qui tournent à crime la plus iuste supplication quise soit iamais faicte en tous les Estats de France?

& qu'ons'ose plaindre publiquement que les gens de bien aient demandé que les offices soient donnez à la vertu, non point à l'argent? Que Monsieur le Prince avant signé ce Maniscette, s'offence qu'on a voulu ofter la Venalité de France, qui est vn de ses plus grands maux, & dont l'abolition cust esté le plus grand bien qui pouvoit reussir de la convocation des Estats? Est-il possible encore vne sois qu'il se pleigne de ce qu'on hazarde la vie du Roy en le mariant si ieune, & qu'en mesme temps il se plaigne aussi de ce qu'on veut oster la Venalité des charges, qui expose son Estat & sa vie à tant dé dangers? Est-il possible qu'vn home qui s'arme pour rendrel'honneurà la vertu, & l'integrité à la Iustice, s'offense qu'on ait osé demander apres les Estats qu'elles ne fussent point venduës? Et pleust à Dieu que la faueur de ceux qui l'ont requis, eust esté plus grande encore qu'ellen'est, & que leur demande leur eust estéaccordée! A la verité l'on leur faict beaucoup d'honeur de se plaindre de cela. Mais ayant traicté ce sujer ailleurs, ie ne m'y veux pas estendre dauantage, si ce n'est pour preuenir vne difference qu'on me pourroit faire de la Venalité auec le droict annuel, qui toutesfois est nulle: car tant que le droict Annuel demeurera, on ne peut ofter la Venalité. Allez croire maintenant que ces gens-là se soucient de la sante ny de la vie du Roy, qui crient qu'on la hazarde en le mariant si tost, & se plaignent d'vn autre costé, quand on veut empescher que par la vente des charges, on ne fasse entrer toutes sortes de gens dans son Conseil, en sa table, en son cabinett où est-ce, ie vous prie, que sa vic est plus hazardée, ou en le mariant auec vne Princesse de son aage, & encore plus

C iij

ieune, ou en l'exposant par la venalité des offices à toute sorte de traistres; empossonneurs, & meurtriers qui peuuent entrer dedans sa maison? Et neantmoins on fait grief de ce qu'on leur a voulu sermer la porte en estaignant le droict Annuel, auec la Venalité des charges.

Que s'il void par là qu'ils n'ont rien moins en la pensée que le soucy de conseruer la vie du Roy, quelque parade qu'ils en fassent pour faire les bons valets; ils se soucient encore moins de poursuiure la mort dufen Roy. Tout cela ne sont qu'artifices & fusils desedition, pour faire presumer au peuple que la Royne ne s'en est pas bien acquittée. Et neantmoins, quels Iuges plus entiers & plus naturels y poudoit-elle employer que le Parlement? Oseral'on dire qu'vne telle compagnie quis est tousiours monstrée si jalouse de la vie de son Prince, aye negligé la iustice de sa mort? Mais qui ne void la foiblesse de ce pretexte, & que Monsseur le Prince ayant tesmoigné par tant d'actions qu'il ne regarde qu'à ses affaires, ne se soucie de la mort du Roy que pour allarmer le peuple, qui a le principal interest en sa perte? Carles grands n'en ont pas empiré leur condition, & Monsieurle Prince moins que tous, qui estant reduit à Milan au train d'vn seul Escuyer, & n'estant rémonté depuis en sa grandeur que par la liberalité de la Royne, n'a pas tant de sujet de s'en plaindre, qu'elle: Mais tel demande raison de sa mort, qui seroit bien marry de le voir en vie.

Qu'on pardonne à la juste douleur que ceste playe me renounelle, si elle me contraint de parler ainsi. Iene suis inspiré d'aucune passion contre personne, & moins contre Monsieur le Prince que tout autre, duquel, hors l'interest du seruice du Roy, se suis tres-humble & tres-obeissant seruiteur, comme ie luy ay tesmoigné il y a plus de dix ans. Et dessirerois auccles gens de bien de le reuoir, tant luy que Monsseur de Longueuille, & du Maine aupres de sa Majesté, comme ils en ont esté conuiez. Mais principalement Monsseur le Prince, qui deuroit en ceste occasion y tenir le rang qui est deu à la grandeur de sa Naissance, ainsi qu'elle luy a commandé, plustost qu'en luy des obeissant se faire remarquer à la posterité, pour auoir esté l'Autheur de tant de calamitez qui accompagnent les guerres ciuiles, & l'argument & subjet principal de ceste Terreur panique.

constituted to me flow a field and control of an another control and control of another control and control of another control of another control of a field and a field of another control of another cont















